

Za tango je potrebno dvoje



Liderima u BiH se ukazala još jedna prilika da ponude konstruktivna rješenja za probleme sa kojima se ova zemlja suočava, ali samo ako prestanu sa poziranjem koje su pokazivali u proteklih 12 mjeseci, piše danas u Euroblicu visoki predstavnik i specijalni predstavnik EU, Christian Schwarz-Schilling.

“Od početka mog mandata, ja sam postupao prema jasnom i dosljednom planu akcije, (često suočen sa žestokim kritikama) u smislu da dopuštam političkim liderima ove zemlje da preuzmu glavnu ulogu i na svoj način rješavaju probleme s kojima se sučeljava Bosna i Hercegovina. Oni su ovu priliku upropastili”, piše Schwarz-Schilling. “Da bi ponovo preuzeli inicijativu, određeni lideri – a oni znaju koji to – moraju promijeniti svoje ponašanje. Moraju raditi konstruktivno da se ponovo inicira proces ustavnih reformi, dovrši provođenje Dejtonskog sporazuma i ispune preostali uslovi za potpisivanje Sporazuma o stabilizaciji i pridruživanju”.

Schwarz-Schilling je i komentirao odluku koju je donio Upravni odbor Vijeća za provedbu mira u Briselu u utorak o produženju mandata Ureda visokog predstavnika do juna 2008. godine.

“Upravni odbor je postupio na ovaj način kao odgovor na moju procjenu da je napredak koji su domaće vlasti napravile za zadnjih 12 mjeseci u pogledu njihovih obaveza po Dejtonu i uslova za proces evropskih integracija bio nedovoljan da opravda zatvaranje OHR-a ove godine”, on je izjavio, dodavši

da je “Upravni odbor jasno stavio na znanje da neće tolerirati nikakav pokušaj podrivanja Dejtona; ponovo je afirmisao suverenitet i teritorijalni integritet Bosne i Hercegovine; i pozvao je mene konkretno da preduzmem mjere da se pobrinem da nadležne vlasti ispune međunarodne obaveze ove zemlje”.

Schwarz-Schilling je naglasio da odluka Upravnog odbora “svjedoči o dobroj volji međunarodne zajednice da nastavi djelovati u partnerstvu sa političkim liderima Bosne i Hercegovine”, ali on je također primjetio da je “za tango potrebno dvoje”.

Tekst [članka](#) visokog predstavnika/specijalnog predstavnika EU dostupan je na www.ohr.int i www.eusrbih.org.